

光緒永嘉縣志

永嘉縣志卷之二十三

古蹟志三

金石中

明 洪武至正德

府城隍勅命碑

奉

天承運

皇帝制曰帝王受

天明命行政教於天下必有生聖之瑞受命之符此天示
不言之妙而人見聞所及者也神司淑慝爲天降祥亦

必受天之命所謂明有禮樂幽有鬼神天理人心其致一也

朕君四方雖明智弗類代天理物之道實罄於衷思應天命此神所鑒而簡在

帝心者君道之大惟典神天有者舉之承事惟謹温州府城隍聰明正直聖不可知固有超於高城深池之表者世之崇於神者則然神受於天者蓋不可知也茲以臨御之初與天下更始凡城隍之神皆新其命瞻此郡城明祇所司宜封曰鑒察司民城隍威靈公威則照臨有赫靈則感通四方此固神之德而亦天之命也司于我

民鑒于郡政享其典祀悠久無疆主者施行

洪武二年正月

日

右碑在府城隍廟

平水王廟碑

右碑在蛟翔巷平水王廟前宋濂撰劉基篆額洪武八年立文見壇廟

御製臥碑

右碑在府學明倫堂洪武十五年立

橫山孚德廟碑

東閣大學士奉政大夫吳沈撰翰林侍講學士奉訓

大夫李翀書 周府長史奉議大夫呂榮篆

天地間有剛明正直之氣人得以生則必負卓越之資懷
文武之畧才足以利物濟人德足以安邦輔治及其沒也
則又能捍大災禦大患民有所依國有所賴故生而封侯
死而廟食此豪傑之士得於天者多而能與宇宙同其不
朽者也余觀永嘉張侯信矣侯諱鉉字子元其先四明人
唐和州刺史無擇之後宋乾德中九世祖始家永嘉迨五
世祖闕仕至吏部尙書端明殿學士贈少師謚忠簡而降
皆高科顯官侯生於嘉定庚辰容貌異常神氣俊爽慷慨
有大志博習經史尤精韜畧善風角雖卜筮方技之書靡

所不究善騎射弓劍絕倫喜交豪俠士年十六領鄉薦試
春官不利乃就右科登端平己未朱熠榜第閣門宣贊舍
人耿介特立足不躡權貴門賄時政口素鬱鬱不樂嘉熙
己亥冬虹見風雹侯上書極言時事忤史相嵩之被斥徑
不返舍遂歸鄉盡散其囊橐於族里之貧者時寶謨閣學
士吳泳守溫訪侯因語曰譖佞浸漬天象垂示不可忘武
備也矧郡城東負山北倚江惟西南跨水枕虛宜亟修理
以備緩急泳然之乃與胥董其事郡之西山侯從曾祖太
府丞墓在焉侯命營一壙其側曰吾不日居是嘗與郡守
燕酒酣謂坐客曰吾欲致力中原不堪矣乃滿引數觥而

出自是忽忽若醉語人禍福秘悉中一日晨與正衣冠告
兄鑄曰上帝以吾有愛君憂民之心命爲平水佐神言既
而逝時居宅外連夕聞人馬金鐵聲年二十一遂葬所營
壙守爲創祠立像水旱疾疫禱之響應德祐末元兵至首
攻西城咸服其先見至元己卯栢寇詹老鷄攻郡城監郡
劉萬奴先遁去安撫徐似孫禱神與戰有張閭門旂見窺
臺峯賊卽潰去旣而閩帥哈刺解舟師自海上至萬奴乃
嫁禍郡邑請於帥將屠城似孫辨不能明侯示夢似孫但
力爭勿懼翌日與萬奴對辨言及神之事帥乃歎曰宋家
忠臣乃爲神乎意大悟民賴以免至大己酉重建廟門儒

士章仕堯撰上梁文夢侯慰謝道及科目事則曰遇虎當
與蛇猴亦起但未覩其頭角耳至延祐甲寅科舉問丁巳
庚申仕堯兩中省試悉符所言有龍泉民張源孫被誣繫
獄夢神謂當拯之因誓曰然則當罄家貲以報已而果獲
脫乃大伐材木新其祠宇至正間海寇攻郡城禱於祠神
顯靈而寇退南台侍御史左答納失里浙東僉憲王武類
其績聞於朝初封協惠侯加封正肅英烈王廟額孚德侯
父撫封顯慶侯母吳氏趙氏封夫人國朝歲祀橫山周公
以侯配焉列在祀典郡人有黃德正者年十九而卒後附
女童言曰我今爲張閣門助神亟肖吾像於祠左唐衣冠

可也或曰助神若是耶答曰歲一紀後凡仕者皆此服矣
至我朝乃驗又有蜃川漁者林毅生平鯁直自塑其像於
祠下而終二神亦有靈響元末皆封將軍然則侯之著於
永嘉久矣今年春前刑部員外郎張昇書來告曰侯之靈
德永嘉人知之天下人未必知也非託文章家爲之彰顯
可乎余因遂輯事狀以錄焉於乎張侯以卓越之才足以
有爲而天不假年勿克大厥設施及其沒也捍患禦災惠
利及人如此豈非所謂剛明正直之氣與宇宙同其不朽
者乎故旣爲之記復以荐享侑神之曲畀其邦人焉詞曰
神宮幾幾兮翼飛雲翔清風泠泠兮靈旂載揚羅肴羞兮

奠桂漿神欣欣兮陟降在堂禦民災兮爲民康易禍爲福兮歿而廟享一時之短兮百世之長春而祈兮秋而嘗報祀無窮兮祚以無疆洪武十六年春三月記

成化十三年龍集丙申春王月吉日重立

右碑在蛟翔里仁濟坊平水王廟

金宗儒墓誌

篆額

故金處士墓誌

奉訓大夫前刑部員外郎張昇撰

賜同進士出身迪功郎高州府化州石城縣丞潘善書

賜同進士出身迪功郎福建建寧府順昌縣丞陳順篆額

永嘉縣志

卷二十三

古蹟

金石

五

郡南溪夫容里金琦以洪武戊辰冬十又二月壬寅葬其
母林氏於塔山原與父虞士合窆先事介嫺家戴子縞氏
以狀詣余請曰先人葬歲先生職秋官弗克求言雖藏猶
未藏也茲葬母幸先生家居儻矜不肖孤而賜文以志則
先人平日行實可徵將不悼其不幸於土中矣子縞余舊
友也重其請弗辭按狀金氏本劉姓五季間避吳越錢武
肅諱易爲金世居樵溪西巷其祖愛夫容三巖之勝遂家
焉處士諱宗儒字季實生於元至大辛亥十月十一日曾
大父諱口大父諱福父諱新母陳氏天分消厚寬忍有容
無城府機筭每以躬耕讀書爲世至樂勤於植立家量出

納惟一日益裕遇窘窶必周卹繇是鄉推善人元季戊戌
秋果抄里劉公寬憤方氏據郡夜率奇兵襲之不克方密
入大索溪居民處士適輸糧留城被執欲加害神色不變
仰面歎曰吾生至此其命也鋏鑰口項鍊久弗開數日金
德完偶過識之力救獲免人以爲積善逢善之應歲己未
是爲 今洪武十又二年春嬰患疾革有二子以善養母
保基業爲諭怡然委順時三月廿又五日也壽六十又九
非所謂好德考終者歟明年庚申冬葬焉娶同里林氏恭
順儉勤相夫口子悉盡道生處士後七歲延祐戊午九月
十又七日卒處士後九年以春正月九日也子男二琦口

女二赤岸王玉白泉陳和其婿也子婦長王氏次口氏孫
男六阜達廣素濟持女一曾孫男五孝敏文庸直女一子
口口公教口口口鄉口抵口山口過其居處士被服閒雅
子孫進趨侍立口口矩度嘗口口口賦詩見口知其家
敦禮可尚旣居秋曹每憶金宗儒口口口越嗚呼處士
不可得而復見矣以處士之勤慎自守澹口口口口口
口順口口生口命口子若孫以德天口昌金氏之門殆未
艾乎琦等承其遺緒口瘁盡情恪遵禮制惓惓焉求立言
以口詔後人可書也已姑志此以慰其哀思不孝口琦口
立石

右碑在■十■都

忠靖王廟碑

右碑在華蓋山忠靖王廟宋濂撰洪武某年立文見壇

廟

案此碑萬曆十二年甲申重立

新修永嘉縣廟學碑

右碑在縣學大成門內張孟儀撰陸新書徐宗起篆額
洪武二十九年立文見學校

重脩温州府廟學碑

前温州府儒學訓導劉覲撰并篆蓋

前温州府儒學教授康恭書

皇明混一海宇文教聿興凡學校之制具諸儀典者其規模視古宏遠矣聖天子卽位之初親幸太學祀先師孔子其所以崇儒重道之意益加隆焉況憲府爲綱紀之司視學校爲風化之原宜其欽承上意而克究厥心也溫郡廟學重建於元延祐甲寅迨今九十餘年矣風雨之所震陵蟲蝨之所侵蝕坍塌腐敗日就圯侈內無以妥神靈容肆習外無以表壯麗肅觀瞻徒委之慨歎而已教授康恭爰具其所壞者凡若干楹申請乃司轉達於部獲拜上可之命經始於永樂五年八月於時有司缺員屬邑各委吏胥以董其事雖嘗庀工營葺然或作或輟反曠日延怠而所

拆卸者愈不足觀矣郡寮亦嘗矧材繕廟然所費者浩僅亦枝梧於畧而已天相夫子之靈固自有在也永樂七年夏僉憲孫公按臨於茲見其力雖旣殫弗完乃諭諸有司曰廟學如是若等之弗完之爾旣有奏可之報盍在遵而奉之乎於是躬撫視以率寮屬嚴程期以督匠氏郡縣之佐奔趨惟謹羣材畢集百工具典故凡大而廟廡堂宇小而齋舍庖福莫不易撓以隆葺朽以堅昔之坍塌者今則翼矣昔之腐敗者今則晁矣暨茨塗聖輪奐一新至於器物之需用嘉木之培植亦皆欲其久而完好也遂以六月初吉落成學校人士咸謂百年垂朽之工復將墮於或作

或輟之手於茲又三年矣今而我公一按臨之頃不逾月而迄成其功吾徒其敢忘所自哉是不可以無述也因俾覲執筆以紀歲月顧覲謏才愧嘗叨廩有年今幸覲茲盛事敢不黽勉以副輿情乎於戲泮宮能修而見詠於詩人者魯侯之德也鄉校不毀而頌美於文士者子產之仁也夫以我公之德之仁著於今者如此吾知濟濟多士皆有克廣德心矣則夫國人寧有不安其教者乎將見風俗丕變使永嘉小鄒魯之稱不爲空言何其幸哉公名逢吉世家九江之潯陽繇胄監敷厯今職云

是年歲次己丑夏六月 日

立石

温州府知府黃信中通判歐陽繼推官蔡榮經歷
刁遜照磨李仲宇檢校嚴平永嘉縣知縣王春
縣丞王壽安主簿錢聚

右碑在府學大成門右

御賜黃淮歸永嘉詩碑

賜少保戶部尚書武英殿大學士黃淮歸永嘉詩

天香早折仙桂枝筆花五綵開鳳池蓬萊之山直奎壁近
侍九重天咫尺永樂聖人臨御初鞠躬稽首陳嘉謨仁皇
監國文華殿左右謀猷共羣彥朕承大寶君萬方相與共
理資賢良傾心寫誠任舊老而卿引疾先還鄉五歷星霜

復相見兩鬢蕭蕭秋滿面朝旭光升紫殿明相對清言良
慰情留之累月不盡意歸心又欲東南征太液清泠涵碧
藻楊柳芙蓉相映好鳧鷖鸚鵡弄晴波紫霧紅雲拂瓊島
芳馨在俎酒在壺工歌鹿鳴續白駒君臣大義士所重心
須廷闕身江湖鴈蕩峯高清不極中有謝公舊遊跡采芝
斲苓可長年應在天南憶天北

右宣宗御賜詩碑在黃府巷卽黃淮舊宅名勝所載奎
文亭卽此是也

黃淮御製詩贊

御製恩賜詩贊 有序

宣德壬子冬臣淮謹以謝恩詣闕賜宴內閣俯留累月賜遊西苑憫臣疲弱許乘肩輿循太液池徧覽勝麗宴於萬歲山麓至榮至幸誠出非常陛辭之次重蒙親灑宸翰製爲詩歌獎諭隆厚煥乎若杲日之照臨郁乎若卿雲之垂蔭副以織金紗衣俾之被服以爲鄉邦之光寵錫駢蕃敷宜罔旣竊惟臣淮質本凡庸才乏世用過承列聖之知遇叨膺顯秩之光榮茲者伏遇皇帝陛下德協重華仁浹庶類下逮顛蒙之無似上厯聖眷之有加雨露沾濡頓使春回於枯枿奎躡炳耀普令光被於儒紳仰荷鴻施圖懷報稱伏媿駑駘之伏櫪有負馳驅重惟葵藿之朝陽誠深仰

戴切惟古者人臣侈君之命勒諸鼎彝以傳永久臣竊援
斯義摹勒貞石垂示來茲永爲家寶謹撰御製恩賜詩贊
一通并奉刻本上進伏惟聖明俯垂睿覽贊曰於穆聖皇
尊臨大寶稽古右文崇儒重道願惟微臣恭爾無庸淵衷
天豁曲賜優容虎拜闕廷龍光下燭錫以宴游恩眷彌篤
親御翰墨敷繹雲章褒獎過厚訓諭孔彰拜手稽首載忻
載喜省躬揣分兢惕靡已仰惟聖製妙幹元機圖書啟秘
奎壁騰輝捧以南還祥慶載途光照衡宇歡溢里閭齋祓
緘滕襲藏惟謹摹勒貞珉覃福祚允稽諸往牒寵異常倫
感填胸臆報乏涓塵願效封人嵩呼三祝惟皇仁聖天心

攸屬皇契天心澤被萬方鴻圖鞏固地久天長臣述贊詞
藏之石室千百萬年永保貞吉

宣德八年六月十一日

右黃淮恩賜詩贊在御製詩碑陰

府學重新從祀碑

温州府儒學重新從祀記

前翰林院檢討温州府儒學教授潘畿撰

郡庠生永嘉王正書 中書舍人胡宗韞篆蓋

洪熙乙巳余自翰林歸典教鄉校明年丁未夏五月颶風
起海上揚沙走石屋瓦傾圮廟廷僅存禮殿口庶從祀舉

皆覆壓冠履縱橫見者驚異或曰與其狼藉於此孰若投諸水火余竊不然因嘆曰吾夫子生於周之季世有德無位惓惓以扶世導民爲念近聘齊魯邾衛遠歷宋蔡梁陳當是之時從游三千口口七十親炙聖人之門而聆道德之教自時厥後由漢暨唐由唐及宋其間名儒大出若左邱明公羊高馬融鄭康成韓愈司馬公周濂溪程朱輩皆有功斯文以紹夫道統之緒聖人之道若日月之明諸子之道若繁星麗天故有國家者莫不尊崇奉祀以爲萬世網常所係不可磨滅由此則人倫明而天下治違此則人其夷狄禽獸者矣先賢遺像其忍輕毀之哉不如擇一幽

所而收藏之以俟賢邦伯之來則治民事神之責有在而
與廢補墜之工不難致也於是擇神庫之東其地寬遂外
加局鑰內免蹂踐亦愛禮存羊之意也越三年戊申秋
今上皇帝重守令之職命湖廣道監察御史廣昌何侯文
淵捧

璽書馳傳來治於溫下車之初問民疾苦因其好惡而爲
去取焉民大悅服首謁廟庭徘徊顧瞻爰及從祀僕迺具
述前故侯慨然曰噫是我職也其敢後乎邦人林業戴文
保等樂於趨事侯復命庠生黃福生劉處聯吳永明林儉
儒士蔡育董其役工師用勸經始於癸丑秋八月十五日

元嘉興元
卷二一三
三
訖工於明年春二月初一日凡從祀之數一百有五東五十有三起單父伯宓不齊止魏國公許衡西五十有二起金鄉侯澹臺滅明止開封侯呂祖謙坐次先後隨其朝代冠服降殺因其祿秩濟濟威儀堂堂冠冕儼然有若生存門廡堂舍昔之傾圮者修復於舊落成之夕侯屬余記其本末於戲溫之爲郡昔號小鄒魯以士習詩書人知禮義故也

天朝混一區宇以

聖繼聖若遠若近文教誕敷凡我邦民允升大猷廟祀旣新瞻容儀而覩賢像者莫不勃然興起而於聖賢道學益

加躬行踐履恢弘道德而有希聖希賢之慕將見忠臣孝子之出而益以振揚鄒魯之遺風也然則侯之斯舉其有補於風化豈淺淺哉於是乎書

宣德甲寅季春月吉日同知張永誠 通判孔彬 推官

曹瑋 經歷黃誠 知事魏源 照磨陳倫

助財人黃文昌 安固王漢洪鑄石

右碑在府學大成門右

新修永嘉縣儒學碑

右碑在縣學大成門內范忠撰金原祺書胡宗蘊篆額

宣德九年立文見學校

何公文淵畫像碑

公名文淵江西建昌府廣昌縣人永樂戊戌登進士第任
監察御史宣德庚戌出守溫州政化大洽作書義庭訓四
書講義傳於郡乙卯秋陞刑部右侍郎既去參與同僚張
受暨諸生仰慕不已遂立公像於郡學先賢祠復刻公留
別詩并序於後九月甲午訓導徐參識

郡守何文淵宣德十年乙卯歲九月十一日欽奉

聖旨陞授刑部右侍郎所慮政事未成民未安堵深有感
於懷迺留詩以別諸父老鄉民 作郡焦勞髮短髮承
恩又入 大明宮行囊不載溫州物只有民情滿腹中

挺山岳之靈秀煥奎壁之文章心瑩乎其秋月仁藹乎其
春陽昔持憲節霜威不滅乎范張繼綰郡符德政遠邁乎
龔黃是宜副六卿之諧弼資九重之贊襄噫斯人也真所
謂霄漢之景星慶雲郊岡之麒麟鳳凰世所見不可得而
常者也

永嘉朱謐贊

得天地之間氣萃河嶽之精英操白簡則風霜凜潔居黃
堂則仁恕廉明除弊政之苛刻絕上下之交征美玉在璞
良金在礦外方內直威而不猛豈非廊廟之珍柱石之臣
是宜補袞默贊經綸不動聲色正笏垂紳噫開國至今罕
見其人 郡民林湜贊

右碑在府學大成門左

張景恕勅命碑

奉

天承運

皇帝勅曰國家推恩臣下必及其親者以重本而勸孝也
而何間於存歿哉大理寺左寺左評事張昇故父景
恕慶鍾厥子而祿養不逮揆其所自宜有顯褒今特
贈爾爲文林郎大理寺左寺左評事靈其不昧尙克
承之

正統二年九月十二日

男昇立石

孫琴書

右碑在永嘉十四都東與明張昇之父景恕墓碑也致昇以歲貢官大理評事景恕贈如其官

重修永嘉縣廟學碑

右碑在縣學大成門內黃淮撰黃養正書楊景衡篆額
正統二年立文見學校

温州府重修廟學碑

榮祿大夫少保戶部尚書兼武英殿大學士知制誥國

史總裁黃淮撰

時習齋訓導徐參書

徵仕郎中書舍人胡宗蘊篆額

溫爲浙左望郡其衣冠文物之懿號稱小鄒魯廟學在郡府東南位置崇嚴規模宏麗

適與

郡望稱然而地瀕大海

颶風震凌易於推毀頃者太守何公文淵力圖緝理工已就緒而何公起赴超擢命旣而颶風歛至弊壞滋甚未

幾今太守劉公謙由名法從以才能受薦來掌郡事視篆

伊始謁廟學

顧瞻

咨嗟退而沈思殫慮鳩資庀材次第經

營貳守徐公恕判府劉公寬推府宮公安暨幕僚黃珩等

先後

繼至合志協

相民不知費工不告勞底于成功向之

欹仄者易以堅良崩墜者加以縝密嚴飾

像

設煥然一新

至於庫廩庖湊靡不完整以正統三年八月望日釋菜告

成凡在班列罔不悅懌論堂後舊有養源堂頽廢有年遺

址尙存教授何濬訓導徐參張受柳廣杜璨白於太守公

喟然歎曰堂名養源是乃居業藏修之地俾知治心而無

慕乎外徇名求實庸可廢乎於是更圖興復拓其舊址構

屋若干楹翼以旁室爲齋宿之次揭扁于堂俾諸生有所

警束可謂不言而教者也教授合師生等以爲斯役之成

爲惠甚侈不可無述垂示將來乃相與造謁請記准卧病

邱園疲舊庸談不足爲軒輊固辭不獲而又喜賢守貳爲

政知所先務於是昌言于衆國家設學養士期真儒爲

用資其素蘊以彌成治化潤澤生民豈直從事於記

誦辭

章之末而已歷年

既久四方郡邑學政馴致淪敷上煩聖

慮申畫教條首言導之孝弟忠信禮義廉恥等事使見諸

踐履

以

端本源至於程試

之文蓋欲驗其造詣

之淺深心

術之邪正設施之當否則以虛浮誇誕套括僥倖爲戒慎

選風憲官專任督察

而假以黜罷之權視前代

提學厥任

尤重惟時又躋胡安國蔡沈真德秀三先生從祀以明道

統勵後進嗚呼皇上之崇重斯文期待士子者至矣盛矣

諸生何幸逢文明之運上承朝廷新政教以勵士風次蒙

郡守新廟學以作士氣又值教授新政浴德澡行躬率四

齋分教以爲範

橫生

也蓋因維新之嘉會進趨乎禮法之

庭敦篤乎爲己之學崇茂實慎名檢以副所望其有超拔
乎等夷者益加振蹈必求至於資深居安之域他日遠大
事業拭目可待也矧吾邦素以小鄒魯見稱於人先正大
儒著美當時垂休汗簡項背相望其流風善俗豈有今昔
之異哉在乎諸生勉之何如耳孟軻氏曰士何事曰尙志
書曰功崇惟志業廣惟勤苟能奮志強力則無所爲而不
遂矣淮邑庠老生也與諸君子居聯桑梓愛之深故言之
切幸無以狂僭見詆庸書爲記并使後之人守而勿替也
里士徐生葉宗輝承命督役克勤厥事亦不可不書

大明正統三年歲次戊午九月朔日立石 知事魏原照

磨凌祐檢校秦恕知縣周紀府吏余澄

右碑在府學大成門左有 損處據介菴集補於偏旁
構屋若干楹下有高廣視昔加三之一句

戒石亭碑陰記

温州府新建戒石亭碑陰記

榮祿大夫少保戶部尙書

武英殿大學士知制誥 國史總裁永嘉黃淮撰

温州府儒學訓導永嘉徐參書

徵仕郎中書舍人致仕永嘉胡宗韞篆

皇上嗣承大寶深維治隆之道莫先於安民屢下詔求賢
膺民社之寄任至重也茲者復

勅藩憲郡邑建戒石亭於廳事之前勒銘於石以示警省

郡守臣謙欽承惟謹厥功告成乃屬臣淮記於碑陰用示

不忘臣淮稽諸簡策戒石有銘始於近古語繁而寡要宋

太宗刪繁就簡僅存四語卽今所刻者是也皇上舉以爲

百司之勸戒是取人爲善之意取善爲訓何問古今此

聖心之所以惓惓而臣僚之所當敬承而無忽也然則四

語之要以不欺爲本不欺卽盡己之忠在己者旣盡則察

之精守之固邪僻不敢奸貨賄不能黷不惑於邪不黷於

三才集卷之三
六十一
三
貨則廉而公公則生明明則是非曲直強弱利害瞭然於
方寸之間以之臨民則民遂其生而怨咨之聲不作以之
事君則食祿無忝而爵位日益崇以之事 天則天心悅
鑒而福慶延於後嗣古之循吏率用此道是以建功業於
當時流芳馨於萬世良可法也淮謝病家居習聞吾郡口
政之詳太守劉公謙歷任風紀廉慎有爲膺薦受任清白
一心以率先於上貳守徐公恕判府劉公寬推府宮公安
同寅協恭秉德不回次及幕僚率皆端敏效職祇服明訓
益勵益勤四邑民庶熙然於春風化日之中一何幸歟嗣
是而來者尙取前人善政爲法本之以中正充之以仁慈

期在政平而下無擾斯可以無愧於民社之寄矣苟或挾私縱暴飾詐偷安視斯銘爲虛文 國家之明法具在可不懼哉可不戒哉

正統五年歲在庚申五月十五日知府劉謙 同知徐

恕 通判劉寬 推官官安 經歷潘纘 知事魏源

照磨凌祐 檢校秦恕立石

右碑在府署大堂外東偏

重脩温州廟學碑

温州府重脩廟學記

王汝覃鐫

中憲大夫都察院左僉都御史致仕黃巖李匡謨

正奉大夫正治卿廣東布政司右布政使郡人阮存書

徵仕郎中書舍人同脩 國史郡人胡宗韞篆

施治貴知本能知本則政靡惟醇事劇惟簡民弗率化惟從所謂本者學校是也於以祇嚴聖靈樂育英俊忠孝禮義於是而講習風俗教化由是而不丕變尙何梗化而龐劇之有故善爲治者必以學校爲首溫郡舊有學歷歲既久口吏部者鮮克圖惟治堂廡齋舍撓腐傾圯生師懼焉厥力稚莫能爲天順改元太守周侯來專郡侯由學校爲名進士翼贊地官練諳庶務簡在

帝心拜今官始至謁

宜廟顧瞻興懷蔽志經理謀及寅佐厥心協一稽於有衆
庶言其同徵工於在官之徒取材於在山之良咨少府楊
與通守曹璽節推趙晟幕賓朱敬狄中時董其役欽者正
之腐者易之敝者撤之如大成殿兩廡明倫堂四齋是也
未脩者補之如嚴鼓會食舊所隘狹復建養源堂東西設
會饌二軒曰養源者欲士子食於斯而思養其良心也朔
考月試舊無定居又創校藝廳左右偏書齋六楹曰較藝
者欲士子列於斯而思策其情氣也以至牲牢庖廩漏廡
之類靡不奐新肇事於天順戊寅又明年辛巳而釋菜告
成郡博周益司訓周魁劉世殷號於諸生曰是舉於斯文

有耀不可無述傳後迺具前事頌末致書來求予記予非能文者竊喜附名聖人門牆因勉而復之曰世之爲守宰者惟知崇飾佛老宮觀以邀福田利益其知

宣聖爲萬代所當尊學校爲導民善俗之本而口理之者幾何人耶周侯可謂知所本矣宜其德化大行於屬邑而人用不犯於訟庭也芳名當與文翁龔遂並傳於世諸生熟漸侯化其必有所感夫其必有所勉夫侯名國字廷璩在莆田爲宦族云銘曰

山川有更 日月有蝕 聖人之道 萬世不易
百里之邑 千里之郡 罔不建學 作養賢俊

學宮口陋 風雨弗除 不有君子 其何能居
曰惟溫庠 歲久傾側 周侯下車 顧瞻怵惕
乃詢寅寮 乃召匠石 完舊益新 門牆翼翼
師生口喜 載礪堅珉 徵我銘詩 以貽後人
大明天順五年龍集辛巳六月既望立石 知事關義
照磨王倫 永嘉縣知縣馬善 老人葉稠生林思遠
右碑在府學大成門左

康氏累世尙義石碑

溫州府知府邵銅 經歷郭銓

康氏累世尙義之石

永嘉縣志

卷二十三

古蹟

金石

三

永嘉縣知縣郭經

成化元年歲次乙酉季冬吉立

右碑在應道觀後巷菜園內康氏何人俟考

鄉貢進士題名碑

温州府暨屬縣儒學鄉貢進士題名碑記

賜進士出身中憲大夫温州府知府閩郡邵銅謨 承德

郎尙寶司丞直 文華殿郡人任道遜書 徵仕郎中書

舍人郡人姜立綱篆

溫爲浙東文獻名郡隸邑五永嘉樂清瑞安平陽泰順卽
漢東甌之地晉始創爲郡至唐人才稍出宋元爲盛若王

十朋趙建大周坦徐儼夫者皆廷對第一賦文章事業炳
若丹青 國朝

列聖相承涵濡煦育造就之深以是人才之出彬彬濟濟
魁廷試則周旋魁浙榜則陳訥王道陳聳經魁則張文選
胡輿章綸呂洪他如名登黃甲官至宰輔者有之登臺憲
方任岳者有之可謂盛矣成化紀元余奉命來守是邦莅
學之初詢及鄉貢題名之碑未立自洪武庚戌迄今二十
九科皆書於明倫堂之左歲久易湮非所以垂永久也遂
命礮石厯書其成名之先後歲月之久近而刻焉仍虛下
方以待來者或曰皋夔伊傅周召之用於唐虞三代者俱

未聞有題名何也予曰古之人雖無所激自能有所成今
之人欲有所成不能無所激是以今之題名於石以激於
當時與古之書名於史以垂於後世同一獎勵之道也況
我 朝廷試有錄以示中外大學有碑以垂永久是烏可
無題名哉今溫士之勒名於石而大書深刻昭示將來非
特侈一郡之榮觀也所以彰 聖化之旁洽於四海也
觀斯刻者必徇名求實而規警風厲寓焉然豈特已用者
哉正使未用者歆動其心勵其志益勉於學以待用也誠
如是則異日賢才之出芳聲偉烈傳播無極斯有以增重
科目而大振士風矣苟或鰥厥官隳名教以貽譏於後世

則不惟負 朝廷設科之意而亦有愧於名邦往哲與樹
碑之心也可不勉與可不戒與

成化三年歲次丁亥春三月望日

同知蔡蒙 通判余鼎寶 推官周正 同立

洪武庚戌科

府學 陳彛 進士

陳珙 進士

甲子科

府學 鄭能

葉宗

張善 同進士

蔣應辰

彭脩 進士

胡盜 進士

永嘉 潘善

陳順 進士

瑞安 李伯靜

葉思尹

卓敬 進士

平陽 林同 進士

陳郁 進士

繆均

潘侃 進士

丁卯科

府學 葉朋

盧賢

陳敏

林珽進士

林道立

瑞安郭真進士

平陽陳訥進士
解元

陳龍

庚午科

府學徐懷玉

永嘉徐鼎

瑞安楊景衡

癸酉科

府學夏遂祿進士

陳孜進士

永嘉金原祺

瑞安嚴叔載

余細榮

陳得謙

平陽吳謙

丙子科

府學潘文奎進士

潘旭

賈琬

永嘉黃諒

瑞安葉蕃

黃聰

平陽游思敬

章參

己卯科

府學陳復

李光進士

劉安真

薛東進士

永嘉劉現進士

黃淮進士

樂清鮑珙

瑞 陳昂

平 李昊

永樂癸未科

府 陳禮 進士

嘉 王道 元

戴文麟

何綬

瑞 林正 仲

金宗

曹睦 進士

乙酉科

府 張文選 進士

經魁 鄭柱 進士

永 梁彬

徐彬 進士

樂 余望

平 吳致文 進士

吳迎

戊子科

府 葉俊 進士

王爵

王道立

永 方以正 進士

嘉 蔡道隆

周文褒 進士

瑞 周南

平 萬英

辛卯科

府 阮存 進士

方祖安

葉允賢

朱良

曹宗鎬

金環

林性安

永嘉縣志

卷二十三

古蹟

金石

齒

樂 鄭丕宗

林軒

瑞 安 狄仲範

平 陽 陳悠

陳端士進

甲午科

府 學 任鳳士進

鄭進祖

嘉 戴時雨

鄭道宣

樂 清 陳以蒙

施義祖

平 陽 張真士進

董許

丁酉科

府 學 葉勝祖

曾氤

徐文靖

劉安定士進

嘉 永 孫隱

張端生

樂 清 蔡光親士進

鄭 夏士進

庚子科

府 學 陳聳士進

王宗惠

朱良暹士進

徐士東

李永本

劉定

陳啓

王豫

永嘉趙詵

鄭道順

章惟澄

樂清范霖

瑞安蔣廷

平陽林約仲

吳磋

蔡挺

陳永

陳奎

張訓

癸卯科

府學葉錫

李廣

許瑩

宋道成

永嘉胡奧

樂清王如曾

陳從道

侯尙震

徐挺

孫孟安

瑞安尤偉

周士平

朱子律

平陽金敬

項律

孔鐸

項佑

宣德丙子科

府學林補

林宏遠

瑞安史濂

平陽鮑輝

己酉科

府學章榮

壬子科

府學林珮

梁宏進士

乙卯科

府學周旋狀元

清樂陳鈍進士

正統戊午科

府學劉邦彥

章綸進士
經魁

平陽陳璣進士

夏朝甫

辛酉科

府學葉光

清樂南昱進士

瑞安何選

楊昕

甲子科

府學婁濬進士

永嘉金敦

葉翀

清樂章唐

郭攀

余欽

屠積

瑞安黃紀

平陽呂洪進士
經魁

丁卯科

府學徐拱

鮑恩

樂清王賓

景泰庚午科

府學陳鐸

劉濬

林時中

陸昇

徐安行進士

永嘉陳本方

李悅

樂清李諤進士

陳懋進士

瑞安鍾清進士

平陽周興

葉璩

癸酉科

樂清于昌祖

章懋

丙子科

樂清何正

鮑椿

瑞安鄒正

吳祚

天順己卯科

府學李觀進士

樂清南昇

壬午科

永嘉王瑞

謝暹

樂清鄭繹

永嘉縣志

卷二十三

古蹟

金石

美

瑞項旻

項秉中

平陽易森

柳演進士

楊瑛

成化乙酉科

府學彭俊

李殷

彭昭

嘉永徐淪

樂章立應

瑞安楊埭

平陽鮑麒

村整

案以上成化年刻以下
五科不知何年續刻

弘治壬子科

府學李階進士

乙卯科

王瓚

經魁榜眼
兩京祭酒

朱諫

進士

戊午科

張璉

甲子科

朱文簡

丁卯科

王激經魁

癸酉科

王澈

右碑在府學明倫堂後洪武甲子科除瑞安三人外鄭能已下府志俱入庚戌科而有沙順昌黃巒徐誠黃達胡澄丁卯科盧賢林珽府志作盧敬賢林挺庚午科府志有孟清孫高癸酉科之陳孜余細榮陳得謙府志作陳滋余世榮陳德謙丙子科黃諒府志入己卯科己卯科上應有建文字黃淮府志入丙子科永樂癸未科府志有金孟因乙酉科府志有鄭志戊子科方以正府志入辛卯科蔡道隆作龍萬英作萬道英辛卯科狄仲範

府志入戊子科葉允賢朱良金環鄭全宗作葉尹賢朱良以金環鄭全宗無林軒有狄士仙癸卯科徐挺府志作徐珽而有葉玳侯指宣德壬子科林珮府志作林佩而有連稷正統辛酉科南昱府志入戊午科甲子科屠積府志不載見於附識丁卯科徐拱府志作徐珙景泰庚午科劉濬李諤府志作劉璿李鏐天順己卯科南昇府志作南昇成化乙酉科彭俊府志入己卯科章玄應入辛卯科徐瀹作徐鑰而有林鳳碑分上下七層橫列立碑之年應以乙酉科爲止乙酉已下空又於下層續刻始自宏治壬子科尙有成化戊子辛卯甲午丁酉庚

子癸卯丙午宏治己酉據府志少八科計一十八人又
壬子科有周紀王朝佐鄭璫李瑾乙卯科陳璋章元梅
季敦戊午科蔡芳董亶甲子科陳定之丁卯科李顯及
癸酉科徐衍等何以不列外有辛酉科侯廷誠庚午科
章九思鄭文夫劉杲張敦諸人皆不列攷戊子至癸酉
四五十年間何難悉數乃晨星寥落缺而不全斯可異
也又府志所載進士碑反遺漏姓名亦多互異倘是志
訛抑係碑逸其異同可覆按也故不備述

陳權墓誌銘

竹原處士陳庸菴墓銘

篆額

同邑城南劉翼撰文

庸菴陳處士世爲柘溪之竹原名族前人厚德有貽厥後而庸菴曾祖君昱祖允實父道莊母蒼坡李氏庸菴諱權字恭巽行永十三平生行事不過奇立異惟務其常以適厥宜是以其菴以庸爲號也六歲早孤母氏撫養長就外傳知書大義不惑異端以背於儒不事淫祀以徼回福而奉先極敬深知立身處家之宜雖藉祖宗餘慶良由母力其母寡居艱棘之詳有河東轉運使安固韓公偉所著陳貞母傳茲不書庸菴有孝行痛早失怙已不及養而事母盡禮太常卿中湖黃公以載聞其母節子孝爲書安節二

字顏其戲采之堂母以壽終庸菴居喪情如其禮處宗族待兄弟撫諸子遇家衆惟中其節他如接姻戚鄉里朋友故舊亦悉合宜以至於扶弱恤匱排難解紛必盡心焉租貸逋負徵索不屑凡膺里役其役下有困乏不能具其該輸者亦代之焉天順四年莆田周公琰時守溫郡鄉里僉辭舉膺耆宿剖訟均役惟平惟允家庭規範不尙嚴厲而子女僮僕悉遵其教不役役於理生而田園儲蓄亦頗羨焉自奉甚薄日用不失其宜不善於酒待賓盡歡官事危迫區畫裕如平生行事私爲私取罔一毫也江西憲副珍川朱公士英其兄士弘早妻以女閨閣賓敬內行之脩亦

足見之男三祥祺裔皆好學者女三皆歸士族棠灣鄭瑛
珍川朱曾朱崇三婿也孫男三明遠明迪明辯孫女一庸
菴之壽五十有八其生爲

有明永樂辛卯十月十六日其卒爲成化戊子八月四日
卒時鄉里無貴賤少長皆嗟悼之至有垂泣者今其子以
卒之年十二月十六日葬本里南山祖塋之側庸菴故交
城南黃蘊圭狀其行奉之來拜請銘於墓石予知庸菴有
素矣而其事宜銘因爲之銘曰

吁嗟庸菴厥號高矣曷謂之庸天下定理惟理既定在不
易爾今也云亡永歸於此後千伯年口口孫子

右碑在柑溪

孤嶼謝公像碑

謝公祠舊有石刻謝康樂像宋慶元丁巳王守洪章立祠廢元至正己丑遷於郡學之先賢祠成化丁酉募刻於江心寺之謝公亭

右碑在孤嶼謝公亭乃募刻郡學本謝公祠舊在華蓋山下先賢祠卽今鄉賢祠故址

案洪字誤郡學碑及府志皆作煥章

貞節亭碑記

王守中妻劉氏貞節之亭

温州府知府項澄 同知姚駿 通判桑瑜 推官黃

縉 府學教授李華 訓導鄭衷 陳瑞 張玘

永嘉縣知縣文林 主簿王銘 教諭廖誠 訓

導陳經 陳新 董事老人趙文璋 下缺

成化十三年歲在丁酉閏二月吉日立

右碑在府學東兩面刻碑之陽爲王守中妻劉氏直節之亭十字作兩行書其銜名年月分列兩旁碑之陰爲

旌節亭記文見後 按石刻題曰貞節亭額則曰旌節

旌節亭記

洪惟我

太祖高皇帝始登大寶詔天下凡民間有義夫節婦奏聞

旌表永嘉王守中妻劉氏年二十九寡有司以應

詔洪武三年庚戌旌表郡守湯公遜書額曰旌表王守
中妻劉氏貞節之門凡十有二字天順七年癸未閏
七月颶門壞守中三從孫祿貧弗能葺以門下堦石
書旌表始末樹於故址成化十二年丙申邑宰長洲
文侯過而詢諸父老遂白於郡大夫劉侯議出官錢
改建立石作亭以覆之石刻曰王守中妻劉氏貞節
之亭凡十字亭額曰旌節初諷以貞節名而文
侯定以旌節蓋旌不失

朝廷旌表之意節則劉氏玉潤之貞已見矣洪武甲子本

郡學教授池裊傳其貞節已詳茲不復舉其事嘗聞節婦夫之不幸守中公雖一時之不幸實其王氏百世之榮幸也舊表門今立石覆以亭蓋門高大易傾圯不若立石作亭之堅樸以爲久遠計然立石不得不覆之以亭旣以亭不得復書貞節之門故曰貞節之亭且亭額曰旌節而石刻曰貞節之亭者其義各有攸說也夫亡不改醮禮也實理也後世澆漓死骨未寒別席已暖故旌之以激然有不可得而激者爲之奈何烏乎口可痛夫過茲亭也睹茲石也不惟有激於爲婦者爲人臣爲人子能無激乎口口劉侯爲

作此亭立此石厥意亦有在矣爲 侯之民不獨視
此爲美觀亦豈獨爲王氏子姓之榮而已哉立石作
亭成化十三年丁酉春閏二月之吉作記書石背以
紀歲月同里劉恒孟貞記并篆額

右碑亭圯址存劉氏事詳列女

李本墓誌銘

明故文林郎江陰知縣李公墓誌銘 篆額

前鄉貢進士臨武縣儒學教諭邑人謝暹撰

上缺

成化丙申正月十月卒於家卜明年丁酉十二月九
日奉襄事於所居里霞山先塋之側其孤弘先期以事狀

墓石屬銘 缺 學其敢以不銘辭按狀公諱本字守仁第評
十四號恒澹其先由閩長溪赤岫徙溫之永嘉仙居鄉霞
岡世守詩禮爲望族 缺 皆口厚長者隱居不仕母東源張
氏娠公口夢貴人乘車馬至其家已而生公口異之嘗曰
亢吾宗者必口口也幼 缺 弟子員已遍誦諸書而通其義
口口口陳先生授書口悉究奧旨問學日益進口永樂庚
子鄉試名在前列明年試禮部得乙榜不就卒口太學宣
德己酉歷政兵部以才敏見稱壬子春

宣宗章皇帝詔吏部慎選賢才以任縣令拜公知長汀縣
治行稱最

璽書 缺 赴

闕適 缺 郎周 口口 奏 口 江陰 缺 知縣之 口 不宜久虛 缺

朝廷 口口 選縣令者十二人特擢公知江陰縣三載述職
賜勅 口 異既 口 任縣之 口口 暴爲民害公屢禁戒之 口 無
悛心反出怨謗不遜語公嘆曰如是尙可爲乎卽引疾以
歸公之在官也令行政舉有不便於民者卽爲革正先是
長汀傳舍畜馬以給使客山路險巇使者皆肩輿以行而
馬爲徒設重困民公

奏除之甲子歲饑江陰之氓流蕩萬計公設方略賑濟多
蒙全活其惠民類若此歸田二十餘年閉門掃迹不預世

故憂□□□以所學教子若孫以謙敬待賓客鄉師扁其堂曰霞岡清趣其樓曰□峰一覽名公碩彥若少師廬陵楊文貞公輩皆爲記序賦詩積成巨帙公生於洪武己巳九月十七日享壽八十有八配郡城王氏隱君宜禮公之女□□司訓廷賢先生女弟也柔嘉慈懿克□內助生洪武庚午十月九日□□先□□□癸巳正月二十四日也側室滕氏蘇氏子男六廣淵厚弘□□廣後公一年卒淵厚皆先公卒女三江西憲副朱公猶子勛楓林徐琴趣先生冢子楷憲副□□子曷其婿也孫男十三培□舒儀敦開淑胤彌軒錫愷鑾孫女二長適錦里戴爽次石柱王璩

曾孫男八憲湛志嘯愈泮岷岷公口口瓌偉德性真摯行
不近名言不飾僞荐厯鉅邑德口長汀民樂其業兆足以
行矣時方期公大用遽乃退處丘壑以獨樂於身雖則享
有高齡具膺多福然爲士者猶不能不爲公惜之係之銘
曰梓杞之卓宜以爲采而斲爲桷干鑲之鋼宜以勦象而
以封羊屈公爲郎再書上最人期登庸公乃勇退卷懷經
濟歸休林園或邀於岡或濯於泉福澤康寧以樂永年於
戲乎公不得於人而得於天夫何憾焉

右碑在四十一都霞山郡邑志選舉永樂庚子舉人有
李永本知縣鄉貢進士題名碑亦作永本疑卽李本

府學新立名宦鄉賢二祠碑

温州府儒學新立名宦鄉賢二祠記

賜進士正議大夫資治尹南京禮部左侍郎致仕樂成

章綸撰

大成殿戟門西舊有祠祀郡名宦及鄉賢之有功於民彞世教者名宦若王羲之謝靈運顏延之劉述楊蟠印應雷何文淵諸公是已鄉賢若王景山周行己劉安節許景衡王十朋陳埴黃淮諸公是已或匡君而庇民或講道而釋經或惇行實或著死節其出處事業雖殊其有功於民彞世教則一夫於民彞世教有功則不悖於聖人之道祀之

於此宜也奈何歷年既久椽棟蠹壞必待大施設者然後
乃能新之迺成化丙申三山項侯來守下車初興廢去蠹
一新郡事而尤重學政凡遇朔望謁見先聖先師仍率僚
屬以謁是祠雖祁寒暑雨不少懈間與貳守安成姚侯駿
通守東吳桑侯瑜等議曰崇祀先哲吾儒分內事也觀是
祠之卑隘欹撓不但無以揭虔且將不日傾頽矣况戟門
東之地直深橫袤與西偏等改作分爲二祠俾名宦鄉賢
各有攸宜不亦輔翼聖門而稱祀有功乎衆皆忻然和之
侯因慮材用計徒庸量事期之畢遂牒通守三山徐侯瓊
總其綱命耆老章蘊明輩董其事以成化己亥臘月望日

鳩工越明年二月朔日畢工倉楹斷桷煥然維新東祠以爲名宦增祀劉謙王允王全尹宏四公凡二十有一人西祠以爲鄉賢增祀劉清朱謚張文選周旋四公凡三十有口人其規模之宏壯位置之端飭視昔大不侔矣於時郡博潯陽李君華司訓合沙陳君端進諸生言曰吾侯舉此盛事其作新學校風勵斯人也至矣使無文以紀其實其何以示今傳後耶茲永嘉令安成劉君遜由進士來舉新政盍與謀之諸生諾往白焉劉君遂捐俸具石來徵文記之予辭弗獲乃作而言曰吾聖人之道與天地參而四時同乃民彝世教之賴以永存者然非賢者不明非達者不

行使出處交得其人以續之則萬世如一日也苟續之非其人雖彼在萬世者固無恙而此於斯世也實無功將何以列於聖人門牆間乎今諸公既明且行之以不悖於聖人而有功於斯世如此非表章而崇祀之則後人於何取法而勸勉耶故項侯厯考其當世行事之迹見其果皆有功於民彝世教以列祀於聖門之側非特諸公之功因以著抑亦俾士之有志於斯道以淑世者知所取法勸勉而由此以入也是則二祠之立豈小補哉况侯持身廉謹寬惠愛民文章政事卓然可稱又安知他日之守是郡者不以侯今日之祀諸公者祀侯乎侯名澄字口口登庚辰進

士第歷官民部郎中擢今職附載於此云

成化庚子夏五月望日 縣丞單進主簿劉永教諭廖誠

訓導陳新鄭瑞同立

右碑在府學鄉賢祠中

儒志王公遺像碑

成化壬寅孟冬後學□□□

右碑在華蓋山碑文多剝蝕

汪珂墓誌銘

明處士耿菴汪公墓誌銘

鄉貢進士湖廣臨武縣儒學教諭邑人謝暹撰文

我永嘉邑之清通鄉耿菴汪處士以成化庚子之歲十二月口口沒於正寢越三年爲成化癸卯二月十日安人朱氏卽世其年十二月朔合葬於所居里李與口之原孤良芮先期奉其長蘆都轉運司同知金公敷及謙牧余君所作傳狀來請銘墓石處士之行頃固嘗聞之况名公之言又可信耶按汪氏宋吏部尙書文定公應辰之後自玉山徙居邑之菰田嶼北三傳至辛五公遇龜出贅黃氏遂世居珍川之霞山自文定至處士蓋十三世詩禮相承引勿替曾祖元旭祖文珍父益號誠菴母徐氏處士諱珂字公則行浩二十八自號耿菴蓋取佩弦之義口實仁厚克柔

克剛樂於爲善勇於爲義事親至孝無間存歿葺祠奉先
先以展愛愨故太常黃公大書思親表其堂太守汪公庭
訓傳其事禮遇宗族甚有恩意垂髻戴白咸得其口心口
口君子嘗以口穀貸鄉人既歿處士不忍責其償貫之歲
饑推所有餘以賑匱乏夏暑設義漿以飲行旅其樂善好
施類若此裁奢省費去繁就簡而基業亦以拓怡情於山
水文翰間而功名之念泊如也晚以家政付諸子而與宗
族親友優游詩酒相娛樂以此自終生永樂甲申十二月
八日壽七十七安人同鄉宦族端莊靜一表儀中間生永
樂庚寅二月二十三日壽七十四子男三長良燾早世室

陳氏清苦守節次卽請銘者娶邵氏次良昇娶朱氏女二
李口邵口其壻孫男六尙圃尙廣尙義尙禮尙蘊尙畊孫
女三嗚呼處士善行可書也其子之賢又能彰明之使有
口於世口非積善之報也與是宜銘銘曰

猗與處士好善敦義施家及鄉有口其類口於天下
口口之口隱而弗彰茲其可歎配厥賢明並緱福澤
生則同堂歿則同室公有積善必大後昆我作銘詩
用昭慶源

右碑在清通鄉李與案汪君之冢婦陳氏清苦守節見
後楊少師所爲汪節婦墓誌銘

永嘉縣令祠堂第二碑

成化十六年夏四月遷拜 命知永嘉既三年邑中幸無事夫斯邑斯民前人所用以治者非獨今日然矣愚何敢墜前人之功于是閱縣志采輿言凡來官斯邑功在斯民政績著聞者擇其尤得若干人列其氏名于碑刻其行實於後乃庇材爲屋表位而居之邑之人士瞻仰稱愜遇朔望則率僚吏而下進拜以起其感慕之心每歲春秋仲月上庚日祀以牲醪凡所祭之需悉出自公而民無所費間嘗走書台之黃巖翰林待詔謝先生名鐸紀其事矣然其氏名之次第祠屋之間架基址之丈尋與其祭物之所出

未能悉書此碑所以繼作也嗟夫創始之艱孰與保之之艱後之人一日必葺俾勿壞使官有所慕而民有所賴遜之志也抑聞諸古人一命之士苟存心於愛物於人必有所濟彼謂州縣之職徒勞人者何其志之苟大而語之失倫耶且凡有功於民者聖賢之所予而以聖賢自期者君子之用心苟待己必將相而望人以聖賢則邑將爲曠位而功難及於斯民矣豈朝廷爲民立官圖治之本意哉因書此碑首佐謝先生以勸來者

成化二十年歲舍甲辰秋七月望日

賜進士文林郎温州府永嘉縣知縣安成劉遜書

齊蕭景 唐吳曾 宋仰仁謙 霍靈

元王安貞 趙塔藕

國朝潘慶 李臻 梁瑀 周紀 文林

附典史張志能

右碑今在四面營財神廟後壁其第一碑已不可考

華蓋山下一清泉三字篆

一清泉 橫列

右刻篆書在華蓋山峯下府志謝靈運與從弟書華蓋山北涌出一泉名爲滴水又名一清泉

一清泉磨崖詩

東山山下泉無塵長皎潔不須比飲廉還似天邊月
混混穿巖出上同天一色不知千萬年誰是濯纓客

口菴題

右詩刻泉左巖石上甌江逸志所載微有不同

一清泉碑

右碑向在東甌王廟橫卧月臺下字磨滅過半今在府

學文廟碑陰

趙鋌墓誌銘

伽菴處士趙公墓誌銘

按趙氏其始祖諱定之者寔

日宋宗室秦悼魏王之六世孫也高宗建炎四年金虜猖獗躬奉鹵簿駐蹕於溫及虜北中興功定從缺保平軍節

度使同平章事紹興六年以疾賜歸鎮温州爵諡忠翊公寓居邑之望京里乃始遷之缺世矣處士曾大父諱光安

大父諱大通考諱漢庸世業儒弗耀母朱氏處士諱鉉字應奎恤菴其缺喪妣晝夜號慟沈疾歲餘未痊而乃考疾

亟屬處士曰吾於父母弗克終養汝當孝奉汝弟皆幼缺

死無憾矣承命頃步弗忘孝奉祖父母皆踰九十而終以禮葬祭二弟誨以詩書爲之有缺之奉與人言必流涕祖

禰墓在賢宰鄉華嚴東輿置祭田六十五畝畸得歲租世

奉祀事

缺

過人暨長天姿純厚度量弘毅家庭間內外斬

斬言詞舉止爲世楷式鄉隣患難助勦捄

缺

者亦弗較素

饒富公私之務繁劇而處之自如歲凶稱貸者踵門無虛

日未嘗口其契

缺

於是家業益裕歲時之祭必洗腆豐潔

以循古禮年甫六旬脫家累於子而

缺

不嗜華靡於聲色

勢利澹如也適歲歉邑宰劉侯以禮端請輸穀八百斛賑

濟貧窶

聖恩立石以旌異之噫宋之孫子南渡者其麗不億而處
士若者代不多見年七十忽徵恙萃長幼而謂之曰壽之
脩短者天數也存養以俟之者人力也吾之事天者固無

愧而天之予我者亦至矣惟口等心吾心事吾事弗墜口
口吾則含笑而歸矣言無何而逝邑之士夫走弔者咸相
謂曰處士斯德斯壽子子孫孫門第聞望若是亦間世之
罕矣吾思易曰積善之家必之餘慶是天眷吉人信有徵
矣生於永樂丙寅口口十七日丑時卒於成化乙巳三月
二十七日寅時享年七十歲配郡之醫學正科陶氏男口
長潛先娶城南陳氏繼娶水心陳氏次口先娶九都黃氏
繼娶祥奧林氏三滂娶東北陳氏四口先娶悌華李氏繼
娶壽寧孔氏女二長適悌華李見次以懿淑選充
國朝嬪嬙男孫三恒恆怵潛等於是年十一月十二日己

未奉柩葬於邑之建牙鄉缺而以行實請予銘予謂處士之德之名昭昭在世耳目者奚翅與山口悠久而在予言之喋喋耶姑述其槩以銘之銘曰

行之充

報必豐

積之厚

傳宜久

惟其然

裔多賢

下缺

右碑在建牙鄉地名關

東門內大井題字

伏承口口重修角井

本里信女林氏二娘捨石版城南信士林壟捨工錢內外鄉里善信各喜捨飯蔬

成化乙巳年中元戊午日玉樞宮道士潘玉英立

永嘉縣令劉公畫像碑

前邑令安成劉公像

橫額

貌博而豐質銳而聰語其量則大而能容萬物語其學則博而無所不通持己之廉無忝乎四知之楊震治人之效不減乎三異之魯恭由其心具浩然之氣故其行合天理之公曩以

帝乏諫臣遽奪民所好奈何子離慈母恒激切于中旣立祠以紓其敬復礱石以肖其容噫若非其仁恩之深被果何以使人追慕於無窮

成化二十二年龍集丙午孟秋之四日福建光澤縣儒學
訓導致仕邑人趙諫頓首拜書

右碑在四而營財神廟內與成化二十年永嘉縣令祠
堂碑並嵌入壁間當爲劉公舊祠

温州府重修廟學碑

鄉貢進士文林郎温州府推官盱江鈕鑑謨文

承務郎中書舍人直文淵閣郡人黃琛書丹

賜進士南京禮科給事中郡人章立應篆額

皇明以文教風天下兩京既有國學以養四方之士於內
若郡若州邑又各有儒學以養四方之士於外教養既周

三才圖會卷之二十一
人材由盛出而輔成

昭代文明之治者率基於此所以善爲政之君子必首先
於學校若三山項公澄者良有以也公守溫政治多善而
於學校之教脩己治人之方尤惓惓注意若大成殿若東
西廡若師生會講之堂暮夜燕休之室垂做而弗稱所事
非所以崇教養也乃共二三僚佐貳守東廣湯君毓通守
滇南豐君齡相與而經營之有不可仍其舊者次第而改
作之仍命幕僚徐玘以掌其計命耆民章蘊明以督其工
始事於成化甲辰之夏明年乙巳之秋而工告畢焉壯麗
高明殊非昔比謁奠足以展其儀藏修游息足以安其志

尊賢養士斯爲稱焉計其工費甚多惟公區畫有方人不知擾興作之初也但見其材之山積與其徒之合散而不見其科臨門役及已也旣作之成也但見其殿廡堂堂煥然爲之一新而不知爲誰之所創造也學之教授黃初訓導陳端冷熙皞梁白鴻暨生徒陸岐金宣等恐久而泯其功謀所以傳世以余知公而請焉夫有爲者無難事公以文學樹家聲尋以名進士而服官政厯官

南畿戶曹尚書郎十又五載所至有爲嘗攝行大司徒事又大有爲迨遷今官所爲又益優矣繩於郡之上人咸稱公善爲郡所以蒞任十年民安物阜因有項太平之謠往

往形諸歌頌積成數十餘冊不可勝書豈直學校一事之可書耶雖然學校乃風化之原所以養士君子而修文德之地古先聖王之所重也自吾夫子以來集羣聖之大成垂六經之明訓其教化之流行大有增重於前矣故歷代相承廟祀於學宮以爲斯文之宗主而我

朝所以崇重之益隆者亦無非欲得君子以修其文德以施其教化而已夫文德旣修君子之教民化俗有其具也具藏諸君子之身雖無封守無儀衛孫吳莫能侵之賁育莫能奪之趙孟莫能而貴賤之其爲體若微其爲用甚大用之於閭門而一家之文雅雍雍也用之於朝廷而普天

之下文風郁郁也昔夔龍伊周有其具而致唐虞三代之
文明顏曾思孟有其具而未用亦足以致天下後世之文
明擴而充之日月星辰在天之文以之而昭著山川草木
在地之文以之而奠安豈直人文之宣明耶學校功化之
大如口豈他事之可比耶能尊其教以爲政可遺之而不
書耶矧溫爲浙東文獻之郡文章政事代不乏人遠未暇
稽自宋以來以文翰而魁天下安邦家者有四焉若十朋
王先生尤表表在人耳目至於

國朝又盛於昔抱佔畢而咏菁莪者濟濟相先展經綸而
籌機務者班班繼作若少保黃先生淮狀元周先生旋侍

郎章先生綸皆發身於學校之中皆嘗以其具而黼黻太平之文采德其所施者甚博也諸士子生於斯樂育於斯又聞知見知之於斯固宜有以先所具而俟所施遠嗣伊周孔孟之遺風近步鄉賢諸先生之芳躅庶幾

國家所以教養之意賢郡守所以作新學校之盛心焉故因其請遂書其大畧以張勸庶幾君子以文會友之願望焉

大明成化二十二年龍集丙午三月吉日立

温州府經歷彭政 知事楊口 檢校胡廣 永嘉縣

知縣曾瑁 縣丞林義 主簿郭亨 縣學訓導陳新

鄭瑞 老人陳秉瑜金口口

右碑在府學大成門右

文林贈柯賓詩

送柯觀光還東嘉詩

莫母施朱西子汚從來仕路可嗟吁休

將枉事追公道直把浮名付太虛古蓼

風烟真客寓東嘉山水舊吾廬緋衣紫

綬終黃土清白歸來且遂初

時成化丁未歲三月朔日

賜進士第南京太僕寺寺丞長洲文林贈

右碑在某都侯攷 案柯賓墓誌云成化甲辰除鳳陽府壽州判官蒞政清慎越五載辭歸觀文侯贈詩殆不得于上官而飄然以去也

旌表許善繼尙義碑

聖旨 旌表許善繼尙義石

右碑在飛鵬巷許善繼忠簡公後裔成化時補爲散郎命有司立石旌之事見嘉靖十年尙義碑陰記

忠烈廟碑

夫善養浩然之氣者湖海不足以爲容金石不足以爲堅
鉄鉞不足以爲威太山不足以爲重卒然遇之雖辯如儀

秦智如良平勇如賁育無所用之而况叛童逆豎肆鼠竊之謀憑鴟張之勢恟疑恐喝朝發而夕斃者哉此儒者之有利益於國家而非尋常文吏武夫之比也昔睦賊方臘據有睦杭掠地婺括乘勢東下建旆於溫目中已無完城矣時天下習安不修武備守吏倉皇棄城而遁郡博劉君士英以一介儒生憤激於中義形於色乃率其徒盧君石生悉力當之踰月以俟王師至而殲焉保完城以還報天子使溫之人民免墊隘之禍爲秉禮之邦果伊誰之力歟雖曰逆不謀順邪不勝正乃常理也方賊藉有五州連衆百萬干戈所向勢如破竹溫以彈丸之地抗連江之師以

習安久靡之民遏勅敵方張之勢苟非以浩然之氣毅然臨之見理而不見口知義而不知害推忠誠以感激人心爲城守之計如劉君者何以振不武之威而收不戰之效者如是哉是氣也充養之既到則爵祿不足辭白刃不足蹈天下國家不足均矣又何有於保一城克強敵乎哉古者執訊獲醜必於泮宮劉君之學可謂深遠而無愧於古者建學立師之意矣君子謂其有儒者之勇仁人之功又豈過情也哉祭法能捍大患則祀之劉君之有廟於溫亦宜矣舊廟在郡學之東百餘步成化間前令文侯宗儒遷於城西新河里又復傾圯無存弘治戊午冬予承乏於此

適文侯復來守溫乃請於侯轉遷於簡訟坊之東偏祠乘
淫瀆汰斥之餘而加新之里卽神之舊隅亦神之所樂棲
也嗚呼神之氣在天地者未嘗無而在人心者不可泯廟
口遷徙無常懼歲月之漫滅也謹請於今守鄧侯安濟爲
之立石如此云

宏治辛酉夏四月望日

賜進士出身文林郎知永嘉縣事新安汪循進之撰

溫州府鄧淮

同知李增

通判劉瑋

推官何鼎

縣丞王宣

典史丁輔立石

右碑在簡巷忠烈廟中

重脩夢草堂碑

溫州衛署之北有圃方數十畝匝其東北隅環而爲池廣
幾半於圃中植芡藕菱芡之屬周以芙蕖蔭以高柳餘圃
以育蔬果蒔花竹供四時之娛幽足以遠鷲曠足以遠觀
卽乎其中四望之則華蓋巽吉羅浮積穀諸山遠近環向
如拱揖然而與喧啾雜沓市井里巷之聲迥不相及閭闔
中乃得此勝概哉舊嘗有夢草堂作於宋至我明正統間
方伯謝公再作之久而復廢今署衛陳侯乃更爲之旣成
以予嘗過其地知其所由請記諸石攷之溫州古永嘉郡
也南北朝謝靈運爲永嘉守多所吟咏而西堂夢草之句

則尤章章於人者也。歷世既遠，西堂已非，而好事者不忘古人思所以存之。此夢草堂所由作也。國朝以郡爲衛，堂亦隨之。陳侯始視事，適承其敝，感然不安於心，乃先爲亭，納遺碑於土中，慨然以必復斯堂自任。宏治己未，會吉安謝公維熙自水部出守於括，適有所考，以紹前人之闕。市材走書，期與侯共成之。而甌太守鄧公洎貳守李公節、推何公永嘉、令汪君又皆捐俸以相其成。於是衆美畢具，羣工丕作，樸之斲之，璣之聖之，不三月而堂成矣。不樸不華，可居可游，有溜有庖，有寢以休，堂之備諸用也。八窗洞啟，羣卉獻秀，水光山色，映帶左右，堂之備諸勝也。冠蓋聯絡，

河東縣志 卷二十一
其集如雲樞古商今資武以文凡四方之吊古攬勝主陳
侯者必於斯焉此又堂之託得其人也西堂之勝不可知
以今觀之夫豈多讓哉

時在宏治己未

右碑在舊衛署後圃中卽今城守營署文爲瑞安令高
賓作碑後年月題名俱漫漶不可辨

修理崇果寺佛殿碑

大隱智深禪師碑記

錄額

時巖崇果寺大隱深禪師修理佛殿碑記

南京大天界寺後板職事鹿城開元寺前住持同門道業

譔

嘗謂釋氏之教以慈悲爲本戒定惠覺爲宗至漢明帝時其教始流於世達磨承之東土煥然通明神聖傳至於今而禪林教苑在在有之若今永嘉仙居鄉柵溪芙蓉里之崑上寺曰崇果者啟基於晉賜額於宋乃天台智者大師圭公創立按郡志凡古之梵刹繼列祖之道顯聖跡之名未有盛於此者也今本山大隱深禪師夙植善根性海空明早從錦巖大廣化寺璣上人之學四明異巖禪師之訓傳授二師之究竟宗旨內有戒德外有素行爲空門中之表表者也暇則危坐參禪以明志而見性入定若杲日麗

虛空之界出定似琉璃含寶月之光晨香夕燈朝參暮禮
俾上有以陰翊

皇慶下有以濟羣品使聞經聽法者咸皆有所成就將見
時巖梵宇法輪常轉佛日增輝今乃成化丙申開田創業
整結壇砌作興常住振益宗風捐衣資修理佛殿妝塑湧
壁煥然一新十入應真聖相莊嚴凡諸登山而游覽者靡
不讚美今已厥功告成實有光於前矣今請同袍求文鐫
石壯觀山門故不辭以爲次第其說云

宏治十五年龍集壬戌三月望日立

右碑在相溪芙蓉里岩上崇果寺中

便止亭記

賜進士及第翰林院國史編脩文林郎兼修會典官邑人

甌濱王瓚撰文

溫壤多枕山瀕海而往來之途在在有之跨山而途謂之嶺捍海而途謂之塘塘又繫水利之大者去郡城東三十里爲膺符鄉沿海有途抵茅竹嶺綿歲滋久雨淫潮齧下隙上窪日就頽壞行者病之歎艱慨阻里正陳狀欲假力於浮屠氏以相是役郡守吉水鄧侯懼疲吾民因命西隱寺休糧僧心明募邑民之好義者各出貲粟以充其費或多或寡惟意所樂於是量工程備畚鍤宿糗糧運礮石坎

窳窳之傾塌築之土力堅完並以石甃西起蒲州荷花埭東止嶺平凡若干丈嶺平故有井味甚柔甘行者恒掬飲之遂面井樹亭爲往來休息之所明心請亭名於鄧侯侯曰是所以便是民之民而止者也宜以是名余家甌海之上入郡城必由是途烈日烜赫則思憩焉風雨驟至則思憩焉履涉憊倦則思憩焉而未有以憩也今途既增固而又亭乎嶺之正中則東西往來魚鹽交錯欲憩卽憩順利恬愜便止命亭不旣協乎衆請石其事以傳余惟道弗不治國無寄寓君子以爲闕政故合方氏掌達天下之道途而視塗除道曷有寓望各以時舉焉然則修道途以利往

來而亭以息之固有司之事而奚假浮屠氏之力哉夫知利之所在而欲興之知害之所在而欲屏之然不得其機而握其要則本以興利反以產害惟夫取諸民之樂助而備石工自爲之役不勞於下費不上於上坐收成功於聲色不厲之表其可謂仁術也已矣明心勤勤懇懇誠感誼激而又重承邦君布惠之志是以民易從而事易集不然則侯豈托異教而愚是民者哉余嘗歎釋氏躡虛駕誕以爲吾道累而不知固吾道之役也肇工於弘治辛酉秋七八一日訖工於壬戌秋八月八日後一月而亭始成亭成而實是碑者使將繼焉以永其利於一方也其可嘉已而

施助氏名則列其碑陰

弘治十五年歲次壬戌菊月

右碑在茅竹嶺上

永嘉學宮圖碑正德四年勒石

圖詳卷首